



Broj: 02-04-1750/23-AP-3
Datum: 21.09.2023. godine

GRADSKO VIJEĆE ZAVIDOVIĆI
n/r PREDSEDAVAJUĆEM GRADSKOG VIJEĆA
Admir Fojnica, prof.

PREDMET: Odgovori na vijećnička pitanja sa 16. sjednice Gradskog vijeća Zavidovići održane 28.07.2023. godine, dostavljaju se

Povodom vijećničkih pitanja postavljenih na 16. sjednice Gradskog vijeća Zavidovići održanoj 28.07.2023. godine, dostavljamo odgovore na iste kako slijedi:

1. VIJEĆNIČKA PITANJA VIJEĆNIKA SKEJIĆ SAMIRA

1. Vijećnik Skejić Samir: Od službe za upravu privrede, poljoprivrede, i komunalnih poslova tražim informaciju u pisanoj formi o stanju poljoprivrede, voćarstva i stočarstva u našem gradu, po mogućnosti da informacije budu svrstane pregledno i po pojedinim oblastima poljoprivredne proizvodnje. S razlogom očekujem da informacija o stanju u poljoprivredi, stočarstvu, uzgoju voća obuhvati sljedeće pojedinosti: ukupnu obradivu površinu, iskorištenu površinu, površine pod uzgojnim kulturama, broj seoskih i poljoprivrednih gazdinstava; broj i ukupnu površinu zemljišta pod voćnom kulturom kao i informaciju o ulaganjima tokom zadnjih deset godina i razvojnim šansama u ovoj oblasti, te informaciju o interesovanju gradskih vlasti da potiču navedene oblike poljoprivredne proizvodnje.

Odgovor na treće vijećničko pitanje (Odgovor je sačinjen na osnovu akta Službe za upravu poljoprivrede, vodoprivrede i komunalnih poslova, broj: 08-45-24-694/23 od 11.08.2023. godine): Stanje poljoprivrede na području Grada Zavidovići je odraz višedecenijskog stanja privređivanja i ranijeg strateškog usmjeravanja države prema industriji a manje prema poljoprivredi, tradicionalno ekstenzivne poljoprivrede na našem području, koja se ogledala uglavnom kao dopunska ili dodatna djelatnost u ostvarivanju prihoda. Poljoprivreda kao dopunski izvor prihoda je također izražena zbog usitnjenosti poljoprivrednih posjeda, nedostatka radne snage i mehanizacije, zbog brdovitog reljefa i često slabih pedoloških osobina zemljišta naših brdskih predjela. Poslije zadnjeg rata veoma je izražena migracija radne snage sa područja grada, kao i iz cijele države, u mnoge zapadne evropske države tako da je prosječna starost onih koji se bave poljoprivredom iznad 55 godina. Zbog svega navedenog mi imamo ekstenzivnu poljoprivredu sa izuzetkom malog broja primjernih, ali malih, intenzivnih proizvodnji u povrtlarstvu, voćarstvu, u proizvodnji mlijeka i kukuruza i u peradarstvu.

Katastarska evidencija pokazuje da je na području Grada Zavidovići evidentirano u hektarima:

- 6 856 ha oranica,
- 1 431 ha voćnjaka,
- 2 633 ha livada i
- 2 974 ha pašnjaka,

- 39 961 ha šumskog zemljišta i
- 1 855 ha neplodnog zemljišta (pretvorenog u puteve, dvorišta, građevinsko zemljište itd.).

Prema našoj procjeni oko 70% od navedenih poljoprivrednih površina se koristi u poljoprivredne svrhe. Međutim, mnoge katastarske oranice, naročito u brdskom dijelu se ne preoravaju već se pokose ili služe za ispašu ovaca, ukoliko nisu zarasle u travnate i drvenaste korove u velikoj mjeri. Plodne oranice pored rijeka se obrađuju i tu je zastupljena prilično intenzivna proizvodnja žitarica a najviše kukuruza u **ratarskoj** proizvodnji.

Voćarstvo je ekstenzivno sa tendencijom da se stanje neće uskoro promijeniti iz razloga tradicionalno neprihvatanja novih tehnologija u uzgoju voća kod voćaka stablašica, dok je kod jagodičastog voća stanje nešto povoljnije ali sa tendencijom smanjenja površina pod intenzivnom proizvodnjom. Generalno gledano u voćarstvu se vrši često sadnja voćaka osjetljivih na biljne bolesti i štetočine i zahtjevnih za kvalitet zemljišta i mikrolokalitete a onda kada se izvrši sadnja logično je da će prinosi voća biti niski sa slabim kvalitetom plodova jer je i proizvodnja na ekstenzivnom nivou. Dokaz za navedeno su i mnoge sadnje voćaka u posljednjih trideset godina kada su se vršile sadnje voća stablašica kupovinom sadnica ili uz donacije sadnica koje su iz savremenog sortimenta i kalemljene na zahtjevne podloge ali je nakon plodonošenja od istih voćaka uglavnom proizvedeno malo voća i to kvaliteta za preradu, a malo voća zvanog stono. Ova godina je pokazatelj naše intenzivnosti u proizvodnji voća kada je rod voćaka stablašica skoro u potpunosti izostao zbog biljnih bolesti uzrokovanih dugotrajnim kišnim periodom u proljeće. Strateški pristup u voćarstvu treba podrazumijevati krčenje zaraženih stabala neizlječivim i karantinskim bolestima, sadnja vrsta i sorti voćaka koje su prilagodljivije našem mikrolokalitetu i našim tehnologijama uzgoja.

U **stočarstvu** je prisutna tendencija smanjenja broja goveda, smanjenjem broja krava i goveda i druge stoke uopšte povlači za sobom smanjenje proizvodnje stočne hrane i zakorovljivanjem poljoprivrednih površina. Naravno i stočarstvo je na našem području većinom ekstenzivno. Objekti za smještaj stoke su često nezadovoljavajući gdje nema dovoljne osvjetljenosti, nema krmnih hodnika u štalama, krmna baza je prosječno nekvalitetna pa je i produkcija mlijeka i mesa po proizvodnom grlu niska. Trenutno samo tri farme predaju mlijeko u otkup na dnevnoj količini od maksimalno 1500 litara mlijeka. Proizvodnja mesa od goveda odvija na tovu junadi sa malim brojem grla, u najviše farmi tovi se jedno do četiri tova grla, a samo na sedam farmi tove se junad od pet do maksimalno petnaest grla.

Ovčarstvo se zasniva na uzgoju oplemenjene pramenke pašnim površinama i samo za proizvodnju mesa gdje praktično nema muže ovaca. Ostale oblasti stočarstva su na mikro proizvodnji u kozarstvu, peradarstvu i drugom, sa tim da u peradarstvu postoje dvije veće farme za tov pilića sa kapacitetima tova od preko dvadeset hiljada pilića u turnusu, i dvije manje farme za proizvodnju kokošijih jaja. Strateški pristup intenziviranju proizvodnje u stočarstvu podrazumijeva kvalitetniji pasminski sastav, kvalitetniji smještaj za stoku i ispuste za soku kojih takođe nema, popravke plodnosti zemljišta i zasnivanju vještačkih livada sa travno djetelinskim smjesama i proizvodnji sjenaže i silaže, kao i kvalitetnijeg sijena.

Broj poljoprivrednih gazdinstava: Iz evidencije u registru poljoprivrednih gazdinstava imamo podatke da je prijavljeno u registar 2 258 porodičnih poljoprivrednih gazdinstava na našem području i 22 klijenta koji nisu poljoprivredna gazdinstva, (udruženja i druga pravna lica). Prema našoj procjeni oko 3 500 porodica se bavi nekim vidom poljoprivrede ali sva lica nisu upisana u registar. Naravno većina lica ili porodica bave se poljoprivredom da podmire dio svojih potreba za poljoprivrednim proizvodima i ne prodaju svoje proizvode.

Kako je vijećničko pitanje veoma zahtjevo kojim se sugerira da se iznesu strateški pogledi u poljoprivredi kroz razvojne šanse u tom smislu možemo odgovoriti da je Općinsko vijeće Zavidovići usvojilo Strategiju razvoja poljoprivrede općine Zavidovići za period 2018.-2023. godine gdje stoje mnogi podaci o brojnom stanju, površinama, razvojnim šansama i drugim parametrima iz poljoprivrede na našem području. Strategija je usvojena pod brojem:

01-24-2372/17-AP-11 od 12.09.2017. godine. U strategiji su naznačene razvojne šanse i uloga lokalne zajednice u svemu tome. Treba napomenuti da su Federacija BiH, kao i kanton, strateški uključeni u pravcu razvoja poljoprivrede i da sa tih nivoa postoji dobra podrška za one koji proizvode hranu. Lokalna zajednica, Grad Zavidovići, ima interes da podrži male poljoprivrednike koji nemaju podrške sa viših nivoa, što i čini za sve oblasti. Da je to tako dokaz je i usvojeni Program utroška sredstava sa „Transfera za razvoj poljoprivrede“ planiranog u Budžetu Grada Zavidovići za 2023. godinu koje je usvojilo Gradsko vijeće Zavidovići. Zajedno sa višim nivoima vlasti Grad Zavidovići daje podršku svim vidovima proizvodnje hrane, investicijama u poljoprivredi, izložbama, pa čak postoje podrške na federalnom i kantonalnom nivou i za atraktivne životinje od kojih nema proizvodnje hrane, za pasminu krava bušu, bosanskog brdskog konja, psa tornjaka i za magarce.

Ulaganja u poljoprivredu zadnjih deset godina: Kada je u pitanju ulaganje u poljoprivredu zadnjih deset godina može se reći da je generalno bilo malo ulaganja u poljoprivredu. Dok je bilo određenih investicija u podizanju velikih farmi za tov pilića (dvije velike farme sa ukupnom investicijom preko dva miliona maraka) i proširenja farmi za goveda u isto vrijeme su ukinute neke male farme i ugašena je i jedna značajna farma mliječnih krava. Formirana je farma magaraca a značajna ulaganja su bila u plastenike (postavljeno je preko dvije stotine plastenika površine od 40 do 300 m²) i poljoprivrednu mehanizaciju (preko 150 motokultivatora i kosilica i oko trideset novih i polovnih traktora dvoosovinaca). Na formiranim farmama za tov pilića i na farmi magaraca, kao i na mnogim malim farmama kupuje se u cijelosti stočna hrana većinom sa drugih područja, dok se na većini malih farmi proizvede i određena količina stočne hrane, više kabaste nego zrnaste. Sjemenski i sadni materijal se uglavnom kupuje i on je često porijeklom iz uvoza.

Povremeno su podizani voćnjaci jabuka, šljiva i oraha na značajnim površinama, na oko 90 hektara, ali paralelno sa tim mnogi podignuti voćnjaci iz ranijeg perioda ali i novoformirani voćnjaci se brzo dovedu u stanje ekstenzivnosti kada je agrotehnika u pitanju. Podizanje malinjaka je doživjelo svoj vrhunac 2014. godine ali je ubrzo nakon niskih otkupnih cijena maline i povećanja cijene radne snage, odnosno nedostatka jeftine radne snage, nastupilo i krčenje malinjaka i drastično smanjivanje površina pod jagodičastim voćem. Treba napomenuti da je kanton redovno davao podsticaje za formiranje voćnjaka na površine 0,2 hektara i većim za stablašice i na površine od 0,1 hektara za jagodičasto i bobičasto voće, dok je za kupovinu sadnica na manje površine od pomenutih podršku davala Općina Zavidovići, sada Grad Zavidovići.

Tradicionalno se malo investira u popravke pedoloških osobina zemljišta iako je kanton u više navrata objavljivao javne pozive u smislu sufinansiranja uređenja zemljišta na površine veće od 0,3 hektara i to za mjere uklanjanja drvenastih i drugih korova, ravnanja, produbljivanja oraničnog sloja, humizacije, kalcifikacije i drugih mjera. Poslednji javni pozivi su predviđali učešće kantona u iznosu od 500,00 KM po hektaru uređene poljoprivredne površine, što je manje nego u ranijem periodu. Sa područja Grada Zavidovići na zadnji javni poziv za uređenje zemljišta nije se prijavilo nijedno lice, što je pokazatelj slabog odziva i činjenice da se tražio zemljišnoknjižni izvod za zemljište koje se uređuje a za većine parcela nisu upisane u vlasničke knjige.

Investicije u poljoprivrednu mehanizaciju i opremu, kao i u gospodarske objekte su generalno na niskom nivou i prate nizak nivo intenzivnosti poljoprivrede iako je od države također bila redovna podrška za investicije u poljoprivredi ili je mehanizacija i oprema dodjeljivana putem federalnog ministarstva za raseljene osobe i izbjeglice, putem raznih donatora u vidu plastenika bez ili uz učešće ministarstava ili Grada Zavidovići.

2. Vijećnik Skejić Samir: Radi praćenja platnih promjena zatražio bih od nadležne gradske službe pregledan izvještaj o povećanju plata uposlenicama gradskih službi u periodu 2016. do 2022. godine.

Odgovor na peto vijećničko pitanje (Odgovor je sačinjen na osnovu akta Službe za upravu finansija, budžet i trezor, broj: 05-45-12/23-AP-193 od 18.08.2023. godine): U skladu sa odredbom člana 4. i 5. Odluke o plaćama, dodacima na plaću i naknadama plaće zaposlenim u općinskom organu državne službe Općine Zavidovići („Službeni glasnik općine Zavidovići“, broj: 3/2015 i 8/2017), propisan j :

„(način utvrđivanja osnovice za obračun plaće)

Osnovica za obračun plaća zaposlenih Općine Zavidovići utvrđuje se odlukom Općinskog vijeća Zavidovići o izvršenju budžeta Općine za svaku budžetsku godinu ili odlukom o privremenom finansiranju i primjenjuje se od 01.01. za svaku narednu godinu.

Pored osnovice za obračun plaće prilikom obračuna plaće koristit će se i bod za obračun plaće koji se utvrđuje odlukom Općinskog vijeća Zavidovići o izvršavanju Budžeta Općine za svaku budžetsku godinu ili odlukom o privremenom finansiranju i primjenjuje se od 01.01. za svaku narednu godinu.

Utvrđivanje osnovice i bodova vrši se u dogovoru sa sindikatom a prije usvajanja odluke iz stava 1. ovog člana.“

„(Utvrđivanje osnovne plaće)

... Osnovna plaća ne može biti manja od 70% prosječne neto plaće isplaćene u Federaciji BiH prema posljednjem objavljenom statističkom podatku.

U slučaju da množenjem utvrđene osnovice boda i obračun plaće i pripadajućeg koeficijenta osnovna plaća iznosi manje od 70% prosječne plaće, zaposlenom će se isplatiti plaća u navedenom procentu.“

Kako je i navedeno u prethodno citiranim odredbama općinski organ uprave je redovno godišnje postizao dogovor sa sindikatom, te u skladu s tim u Odlukama o izvršenju budžeta konstatovana vrijednost boda za utvrđivanje osnovice za obračun osnovne plaće, te u nastavku donosimo podatke kako slijedi:

1.) U periodu 01.01.2016. – 31.12.2018. godine, osnovica za obračun osnovne plaće iznosila je **285,00 KM**, a bod za ovaj period iznosio je 1,00. U posmatranom periodu prosječna plaća u F BiH (za novembar mjesec 2015., 2016. i 2017. g.) iznosila je:

1.1.) 827,00 KM („Službene novine“, broj: 04/16, 20.01.16. g.), te je 578,90 KM (70% prosječne plate) odnosno za Pomoćnog NK radnika sa najnižim koeficijentom 1,85, osnovica bi trebala iznositi 312,90KM;

1.2.) 851,00 KM („Službene novine“, broj: 04/17, 20.01.17. g.), te je 595,70 KM (70% prosječne plate) odnosno za Pomoćnog NK radnika sa najnižim koeficijentom 1,85, osnovica bi trebala iznositi 322,00 KM;

1.3.) 868,00 KM („Službene novine“, broj: 04/18, 19.01.18. g.), te je 607,60 KM (70% prosječne plate) odnosno za Pomoćnog NK radnika sa najnižim koeficijentom 1,85, osnovica bi trebala iznositi 328,40 KM;

iz prezentovanih podataka vidi se da je u konkretnom periodu za zaposlene sa koeficijentom 1,85 bilo potrebno namiriti platu do 70% i to u rasponu od 68,45 KM / mjesečno počev od 2016. godine do 80,35 KM / mjesečno u 2018. godini.

2.) U periodu 01.01.2019. – 31.12.2019. godine, osnovica za obračun osnovne plaće iznosila je **310,00 KM**. U posmatranom periodu prosječna plaća u F BiH (za novembar mjesec 2018. g.) iznosila je:

2.1.) 907,00 KM („Službene novine“, broj: 03/19, 23.01.19. g.), te je 634,90 KM (70% prosječne plate) odnosno za Pomoćnog NK radnika sa najnižim koeficijentom 1,85, osnovica bi trebala iznositi 343,20KM;

iz prezentovanih podataka vidi se da je u konkretnom periodu za zaposlene sa koeficijentom 1,85 bilo potrebno namiriti platu do 70% u iznosu minimalno 61,40 KM / mjesečno, tokom 2019. godine.

3.) U periodu 01.01.2020. – 30.04.2021. godine, osnovica za obračun osnovne plaće iznosila je **330,00 KM**. U posmatranom periodu prosječna plaća u F BiH (za novembar mjesec 2019. i 2020. g.) iznosila je:

3.1.) 932,00 KM („Službene novine“, broj: 05/20, 22.01.20. g.), te je 652,40 KM (70% prosječne plate) odnosno za Pomoćnog NK radnika sa najnižim koeficijentom 1,85, osnovica bi trebala iznositi 352,60 KM;

3.2.) 966,00 KM („Službene novine“, broj: 05/21, 20.01.21. g.), te je 676,20KM (70%, prosječne plate) odnosno za Pomoćnog NK radnika sa najnižim koeficijentom 1,85, osnovica bi trebala iznositi 365,50KM;

iz prezentovanih podataka vidi se da je u konkretnom periodu za zaposlene sa koeficijentom 1,85 bilo potrebno namiriti platu do 70% i to u rasponu 41,90 KM / mjesečno počev od 2020. godine do 65,70 KM / mjesečno, početkom 2021. godine.

4.) U periodu 01.05.2021. – 31.12.2021. godine, osnovica za obračun osnovne plaće iznosila je **360,00 KM**. U posmatranom periodu prosječna plaća u F BiH (za novembar mjesec 2020. g.) iznosila je:

4.1.) 966,00 KM („Službene novine“, broj: 05/21, 20.01.21. g.), te je 676,20 KM (70% prosječne plate) odnosno za Pomoćnog NK radnika sa najnižim koeficijentom 1,85, osnovica bi trebala iznositi 365,50 KM;

iz prezentovanih podataka vidi se da je u konkretnom periodu za zaposlene sa koeficijentom 1,85 bilo potrebno namiriti platu do 70% u iznosu minimalno 10,20 KM / mjesečno, a tokom ostatka 2021. godine i do 50 KM / mjesečno.

5.) U periodu 01.01.2022. – 31.12.2022.godine, osnovica za obračun osnovne plaće iznosila je **390,00 KM**. U posmatranom periodu prosječna plaća u F BiH (za novembar mjesec 2021. g.) iznosila je:

5.1.) 1.022,00 KM („Službene novine“, broj: 05/22, 04.02.22. g.), te je 715,40 KM (70% prosječne plate) odnosno za Pomoćnog NK radnika sa najnižim koeficijentom 1,85, osnovica bi trebala iznositi 386,70 KM;

iz prezentovanih podataka vidi se da je u konkretnom periodu za zaposlene sa koeficijentom 1,85, samo početkom 2022. godine nije bilo potrebno namiriti platu do 70%, dok je to već u drugom kvartalu bilo potrebno namiriti u iznosu približno 60 do 90 KM / mjesečno, tokom drugog dijela 2022. godine.

6.) U periodu 01.01.2023. – i dalje do 31.12.2022. godine, osnovica za obračun osnovne plaće iznosi **420,00 KM**. U posmatranom periodu prosječna plaća u F BiH (za novembar mjesec 2022. g.) iznosila je:

6.1.) 1.161,00KM („Službene novine“, broj: 4/23, 17.01.23. g.), te je 812,70 KM (70% prosječne plate) odnosno za Pomoćnog NK radnika sa najnižim koeficijentom 1,85, osnovica bi trebala iznositi 439,30 KM;

6.2.) 1.231,00 KM („Službene novine“, broj: 46/23, 21.06.23. g.), te je 861,70 KM (70% prosječne plate) odnosno za Pomoćnog NK radnika sa najnižim koeficijentom 1,85, osnovica bi trebala iznositi 465,80 KM;

iz prezentovanog podatka vidi se da je u konkretnom tekućem periodu za zaposlene sa koeficijentom 1,85, već početkom 2023. godine potrebno je namiriti platu do 70% u iznosu 35,70 KM / mjesečno, dok je to sada (juli, 2023. godine) potrebno namiriti u iznosu 84,70 KM / mjesečno, a do kraja 2023. godine bit će potrebno namiriti platu i za iznos približno 100 KM.

Kako je u uvodu i navedeno obračun plate radi se prema važećoj Odluci o plaćama, dodacima na plaću i naknadama plaće zaposlenim u općinskom organu državne službe Općine Zavidovići („Službeni glasnik Općine Zavidovići“, broj: 3/2015 i 8/2017) koja je opet usklađena sa

Zakonom o plaćama i naknadama u organima vlasti Federacije BiH („Službene novine F BiH“, broj: 45/10, 111/12 i 20/17), međutim iz prezentovanih podataka jasno se vidi da je sindikat uposlenih organa uprave Grada / Općine Zavidovići kod dogovaranja osnovice odnosno boda za obračun osnovne plaće, sa Rukovodicem organa uprave Grada Zavidovići, imao razumijevanja dogovarajući osnovicu za sveukupnu socio-ekonomsku situaciju za područje grada / općine tako da je osnovica za obračun plate bila uglavnom ispod ili približno minimalne za 70% od prosječne plate, za radno mjesto namještenika sa najnižim koeficijentom 1,85. Koliko god je u minulom periodu bilo razumijevanja, također je i za ubuduće zakonska obaveza, a svjedoci smo iz godine u godinu sve će teže biti usklađivati minimalan iznos zakonske obaveze prema zaposlenim sa finansijskom mogućnošću praćenja „rasta“ prosječne plate u Federaciji BiH i realnog godišnjeg rasta budžeta.

3. Vijećnik Skejić Samir: Od nadležne gradske službe tražim izvještaj o ukupnom broju zaposlenih u proizvodnom sektoru na nivou grada uz tačno navedene podatke o broju zaposlenih u preduzećima s više od deset radnika/uposlenika.

Odgovor na šesto vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-236/23 od 22.08.2023. godine): Kako sadržaj odgovora predstavlja podatke označene kao **porezna tajna**, odgovor na ovo pitanje je dostavljen posebnim aktom broj: 03-45-9-232/23 od 21.08.2023. godine.

4. Vijećnik Skejić Samir: U predstojećem izvještajnom periodu od svih mjesnih zajednica tražim da dostave cjelovit finansijski izvještaj za prethodnu kalendarsku godinu. Izvještaj treba da bude integralnog karaktera, da sadrži sve pojedinosti o stanju nepokretne i pokretne imovine, posjedu katastarskih čestica u svom vlasništvu, prometu nekretninama, ostvarenoj dobiti od prodaje, vrstu i broj kupoprodajnih ugovora; ime i prezime kupca nekretnine, veličinu prodane parcele, namjenu novca od ostvarene prodaje, novčani bilans na početku i kraju godine, planove i ostvarenje planova na nivou kalendarske godine.

Odgovor na sedmo vijećničko pitanje: Služba za upravu društvenih djelatnosti, pitanja boraca i opću upravu nije dostavila odgovor na vijećničko pitanje.

2. VIJEĆNIČKO PITANJE VIJEĆNIKA SINANOVIĆ ASIMA

Vijećnik Sinanović Asim: Naime, radi se o putu Vikovići-Mustajbašići-Brašljevine.

2001. godine planirana su bila sredstva da se sanira put koji je u vrlo teškom stanju, znači maltene da je neprohodan.

2022. godine trebao je da se odradi taj put, došlo je do nekih, ne znam ni ja problema, jer se neko žalio na tender i jednostavno nije tender taj urađen, tako da je prošle godine u decembru ponovo raspisan tender i taj tender je dobio Porobić. Međutim do dana današnjeg niko ništa nije poduzeo po tom pitanju. Ja sam podnio zahtjev inspekciji za ceste, izašao je inspektor na lice mjesta i ustanovio je da je put katastrofalan i da će u što kraćem roku doći do obustave autobusnog prevoza, ali i ostalog prevoza. Zato vas molim da službe koje su zadužene da mi daju odgovor kad će se to uraditi i da li će se uopšte uraditi. Toliko od mene. Hvala.

(Podnosilac inicijative u prilogu dostavio - Nalaz inspekcije za ceste Grada Zavidovići, izvršen na dijelu lokalne ceste Vikovići - Mustajbašići - Brašljevine, broj: 03-23-1478/23 od 09.06.2023. godine)

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-236/23 od 22.08.2023. godine): Grad Zavidovići će u okviru redovnog održavanja lokalnih cesta za 2023. godinu izvršiti nužnu sanaciju oštećenja na lokalnoj cesti Vikovići – Mustajbašići - Brašljevine. U planu je da se radovi izvrše do kraja septembra 2023. godine.

3. VIJEĆNIČKO PITANJE VIJEĆNIKA TUZLIĆ FEHIMA

Vijećnik Tuzlić Fehim: Moje vijećničko pitanje se odnosi na sljedeće, podnio sam inicijativu prije par mjeseci u ulici Jusufa Polića Ribara za dio sanacije i realizacije koja ide iz pravca Potkleča i kada će doći do realizacije iste?

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-236/23 od 22.08.2023. godine): Obzirom da je ulica „Jusufa Polića Ribara“ dio regionalne ceste R-466 Zavidovići –Ponijeri - Kakanj, Grad Zavidovići se obraćao Kantonalnoj direkciji za ceste po pitanju rješavanja sistema odvodnje oborinskih voda. Do današnjeg dana nemamo povratnu informaciju po ovom pitanju.

Međutim, kako je samo vijećničko pitanje nejasno postavljeno, te nismo sigurni da se isto odnosi na ovu problematiku, molimo Vas da vaše pitanje dodatno pojasnite ukoliko odgovor nije zadovoljavajući.

4. VIJEĆNIČKO PITANJE VIJEĆNIKA HODŽIĆ HARISA

Vijećnik Hodžić Haris: Za ovu sjednicu imam jedno vijećničko pitanje koje ću podnijeti u usmenoj formi, a tiče se toga da obzirom da danas imamo Izvještaj o radu mjesnih zajednica i da u izvještajima u koloni tamo namjenskih sredstava, prihoda nije baš na neki način „realno“ iskazan iznos sredstava koji je uplaćen mjesnim zajednicama na transakcijske račune od strane Općine Zavidovići. Tražim evo da na toj tački vijeće dobije tu informaciju, tražim od gradske službe da nam dostavi informaciju koliko je tačno sredstava iz Budžeta Općine Zavidovići u toku 2022. godine uplaćeno mjesnim zajednicama na transakcijske račune. Toliko, hvala.

Odgovor na vijećničko pitanje: Služba za upravu društvenih djelatnosti, pitanja boraca i opću upravu nije dostavila odgovor na vijećničko pitanje.

5. VIJEĆNIČKO PITANJE VIJEĆNIKA HUSKIĆ HASIBA

Vijećnik Huskić Hasib: Ko je nadležan i koliko smo u mogućnosti uticati na izvođenje radova na putevima u jeku godišnjih odmora, kada je u gradu ionako gužva, pogotovo u vrijeme kada nam dijaspora dolazi? Ja bih volio da mi se odgovori, a i ne mora, da bar pokušamo da riješimo koliko god možemo, jer znamo da velik promet, pogotovo kad nam dodje dijaspora.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-236/23 od 22.08.2023. godine): U pravilu Grad Zavidovići vodi računa da se sanacija udarnih rupa i održavanje gradskih ulica vrši u periodu godine kada nisu velike gužve, odnosno prije početka godišnjih odmora i dolaska dijaspore. Međutim zbog izrazito nepovoljnih vremenskih prilika i kasnijeg početka građevinske sezone nego ranijih godina, te nagomilanih obaveza izvođača

radova, neki od radova su se morali izvesti u ovom periodu, a kako bi izvođači radova zadržali svoju dinamiku te ispoštovali ugovorene obaveze.

NAPOMENA: U vezi odgovora na šesto vijećničko pitanje vijećnika Skejić Samira, napominjemo da je porezna tajna sve informacije ili podaci o poreznom obvezniku kojima raspolažu porezni organi, te ste dužni čuvati iste u skladu sa članom 7. stav (1) Zakona o Poreznoj upravi Federacije BiH („Službene novine FBiH“, broj: 33/02, 28/04, 57/09, 40/10, 27/12, 7/13,71/14, 91/15 i 44/22). Navedena konstatacija je dostavljena aktom Porezne ispostave Zavidovići broj: 13-4/2-45-1-963/23 od 17.08.2023. godine.

S poštovanjem

Dostavljeno:

1. Naslovu,
2. U spis.

GRADONAČELNIK

doc. dr. Hašim Mujanović

Obradio: _____
(Nermin Čahtarević)